

ILUARSIISSUT

Isumaliutissiissut 15. oktoberimik ulluligaq taarserpaa.

(Ulloq 4. Naalakkersuisunut Ataatsimiititaliap kaammattuutaani naqinnerlutamik naqqiineq kiisalu ilisimatitsiffiusumik ataatsimiinnermi pillugu immikkoortoq nutaaq)

Uunga siunnersuut: Filmiliortarneq pillugu Inatsisartut inatsisaat

*Meeqqanut, Inuusuttunut, Ilinniartitaanermut, Kultureqarnermut, Timersornermut
Ilageeqarnermullu Naalakkersuisumit saqqummiunneqartoq*

pillugu**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap****siunnersuutip aappassaaneerneqarneranut****ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Najaaraq Møller, Siumut, siulittaasoq

Inatsisartunut ilaasortaq Mette Arqe-Hammeken, Naleraq, siulittaasup tullia

Inatsisartunut ilaasortaq Dines Mikaelen, Siumut

Inatsisartunut ilaasortaq Peter Olsen, Inuit Ataqtigiit

Inatsisartunut ilaasortaq Edvard Nielsen Aronsen, Inuit Ataqtigiit

UKA2024-mi ulloq 25. september siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Kalaallit Nunaanni filmiliortarneq pillugu inatsisitigut sinaakutissanik pilersitsisoqarnissaa siunnersuummi matumani Naalakkersuisunit kissaatigineqarpoq, tassuuna filmiliortariaaseq inuussutissarsiornikkut piorsarsimassutsikkullu tapersorneqassalluni. Taamaaliornikkut kalaallit filmiliaat Kalaallit Nunaanni nunanilu allani siammarterneqalerlutillu siuarsarneqalissapput.

Siunnersuutip ilusilersorneqarnera Naalakkersuisut filmiliortarneq pillugu suleqatigiissitaasa suliaat nassuiaasiaq ” Inassuteqaatit qanoq aaqquussinikkut Kalaallit

Nuaanni filmiortarnerup nukittorsaavigineqarnissaa pillugu” naapertorlugu suliarineqarpoq, taanna immikkoortut UPA2022/75, UKA2023/46 kiisalu UPA2024/56 piviusunngortinneqarnerinut atatillugu pilersinneqarnikuulluni. Taamaalilluni Kalaallit Nunaanni Filminstituttip pilersinneqarnissaa siunnersuummi ilaavoq, tassani ilaatigut filmkommission pilersinneqassalluni kiisalu nunatsinni filmiornissamut tapiissuteqarnerit, qinnuteqaatit allallu pillugit allaffissornerit ingerlatsinermi suliarineqartassallutik, kisiannili aamma instituttip ataani filmiornermut sulliviup akisussaaffiginissaa.

Siunnersuutip Inatsisartuni siullermeerneqarnera

Nunatsinni filmiortarneq pillugu inatsisiliornikkut sinaakkusiinikkut nukittorsaasoqassasoq nunarpullu filmiortartunut nunanit allaneersunut pilerinarsarneqassasoq isumaqatigiiffiulluarpoq. Siunnersuutip ilalernerneqarnerata saniatigut ajornartorsiutit assigiinngitsut siullermeerinninnermi eqqartorneqarput. Aningaasaqarnikkut allaffissorinikkullu kingunerisinnaasai oqallinnissamut annertut pissutissaqalersitsipput. Amerlanerussuteqartunit oqaatigineqarpoq Filmiortarneq pillugu Inatsisartut inatsisaat filmiortartut nunatsinneersut kissaataannut naammassinnittuussasoq aammalu aningaasat immikkoortinneqartut instituttip aallartilluarnissaanut qulakkeerinnittuussasut.

Tusarniaanermut akissutit

Naalakkersuisut ilisimatitsissutigaat siunnersuut attuumassutilinnut tusarniutigineqarsimasoq piffissami **17. juni - 15. juli 2024**. Tusarniaanermut akissutit tunniunneqartut inatsisissatut siunnersuummut kakkiullugit ilanngunneqarput, tamanna Inatsisartut Siulittaasoqarfiata ilusiliinissamut piunasaqaataanut naapertuuppoq. Tassunga atatillugu ataatsimiititaliamit maluginiarneqarpoq soqutigisallit tallimat siunnersuummut oqaaseqaateqarsimasut, aammalu kukkusoqarsimanera pequtaalluni Eqqumiitsuliornermik Aningaasaateqarfik (EA) tusarniaanermi atortussanik tigusaqarsimanngitsoq, taamaalillunilu tusarniaanermut akissummik kingusinnerpaamik ulloq 5. august nassiussinissaminut akuersissummik pissarsilluni. Taamatuttaaq ataatsimiititaliamit maluginiarneqarpoq tusarniaaneq aasaanerani ingerlanneqarsimasoq.

Tusarniaaffigineqartut siunnersuut pitsaasutut kalaallit filmiortarnerannik siuarsaataasussatut isigigaat ataatsimiititaliamit paasineqarpoq. Maluginiarluguli EA aamma Kommuneqarfik Sermersooq akissutiminni allassimagaat 3.900.000 kr. Kalaallit Nunaanni Filminstituttimut immikkoortinneqarsimasut ajornartorsiutaasoq, tassami kulturimut tapiissutinik ataatsimoortitsinissamut kissaateqarnikkut EA pilersinneqarnikummat.

Sassartitsinerit

Film.gl sinnerlugu peqataasut siunnersuut pillugu isiginnittariaasertik ataatsimiititaliamut ulloq 30. September saqqummiuppaat. Sassartitsinerup nalaani Film.gl'p isummersuutai pillugit ataatsimiititaliamut saqqummiisoqarpoq (**ilanngussaq 1**).

Nuuk International Filmfestival aamma Filmiliornermut sullivik Filmiliornerfik sinnerlugu siunnersuut pillugu isummersuutitik ulloq 7. kiisalu 8. oktober saqqummiuppaattaaq.

Iisimatitsiffiusumik ataatsimiinnerit Naalakkersuisunullu apeqqutit

Ataatsimiititaliap siunnersuummik suliarinninneranut atatillugu Meeqqanut, Inuusuttunut, Kultureqarnermut, Ilinniartitaanermut, Timersornermut Ilageeqarnermullu Naalakkersuisoq ulloq 14. oktober 2024-mi ataatsimiititaliamit ataatsimeeqatigineqarpoq. Iisimatitsiffiusumik ataatsimeeqatiginissamut aggeqqusissutip aammalu ataatsimiinnermi eqqartorneqartut pillugit apeqqutinut akissuteqaataasa assilineri isumaliutissiissummut matumunnga **ilanngussaq 2-itut** aamma **ilanngussaq 3-tut** kakkiunneqarput.

Siunnersuutip ilusiligaanera

Naalakkersuisut allannguutissatut siunnersuutini siunnersuummullu erseqqissaassuteqarlutik saqqummiussinerat ataatsimiititaliamit naammagisimaarneqarpoq. Tamatuma kinguneraa siunnersuut oqaaseqaatillu nalinginnaasut pillugit naqqiissummik ulloq 18. September 2024 nassiussisoqarsimanera.

Ataatsimiititaliap siunnersuummik suliarinninnera

Filmiliorarneq pillugu inatsisissaq taparserneqarluartoq ataatsimiititaliamit maluginiarneqarpoq, kisiannili aamma maluginiarneqarluni siunnersuummi pissutsit assigiinngitsut pillugit erseqqissaassuteqartoqarnissaanik ujartuisoqartoq. Tassunga ilaallutik aningaasaqarnikkut kingunerisassai, siulersuisut katiterneqarnerat innersuunneqarsinnaasullu, Eqqumiitsuliornermut Aningaasaateqarfimmiit aningaasat tapiissutissatut immikkoortinneqartut, filminut toqqorsivik filmiliornermullu akuersissuteqarnissamut piunnaasaqatit. Inatsisissatut siunnersuut **sinaakktissatut inatsisaasoq** ataatsimiititaliamit aamma maluginiarneqarpoq, taamaattumik **aalajangersagassartai Naalakkersuisunit aalajangerneqassallutik**. Filmiliornerup teknikitigut sukkasuumik ineriartornera taamaattumillu atugassarititaasut allanngoriartorneri Naalakkersuisunit tamatumunnga tunngavilersuutigineqarpoq. Taamaattumik nalunaarusiornikkut aaqqiissuteqartoqarnissaa pisariaqassaaq.

Filminstitutti aamma filmkommissær

Siunnersuummi § 5, imm. 1, filminstitutti pisortat suliffeqarfiat namminersortut aalajangerneqarpoq. Tamanna Kalaallit Nunaanni Filminstituttimut tunngassuteqassaaq, tassani suliasarineqassalluni **nunatsinni filmiliornerfik siunnersuutit** aamma **tapersorsorneqarnissaat**, tassunga ilanngullugit piginnaasalinnik ineriartortitsineq,

tuniniaaneq, saqqummiussinerit aammalu kalaallit filmiliaannik ineriartortitsineq. Instituttip **pilersinneqarnissaanut aningaasaliissutit ukioq 2025-mut aningaasaqarnikkut tamakkiisumik qulakkeerinnittoqarsimangitsoq** Inatsisartut siullermeerinninnerini uparuarneqarpoq. Taamaattumik inatsit akuerineqassappat filmiortarnerup siuarsarneqarnissaanut siunnersuummi siunertarineqartup naammassinngitsoorneqarnissaa **ernummatigineqarpoq.**

Af forslagets § 5, fremgår følgende:

§ 5. Kalaallit Nunaanni Filminstituttip siunertaraa:

- 1) *siuarsassallugu filmiortarneq, filmertarnerup kulturia aamma nunatsinni filmertarfeqarnermi kulturi,*
(Ataatsimiititaliamit erseqqissarneqartut)

Filmertarfeqarnermi kulturi Kalaallit Nunaanni piffinni ikittuinnarni filmertarfeqartuni periarfissaasoq ataatsimiititaliamit ilisimaneqarpoq. Ataatsimiititaliap **Naalakkersuisut kaammattuuteqarfagai** allannguutissatut siunnersuusioqqullugit, taamaalilluni **filmertarfeqarnermi kulturi** allanngortinneqassalluni **filmfestivaleqarluni kulturimut**, tassami piffinni filmertarfeqanngitsuni festivalit ingerlanneqarsinnaapput.

Filminut toqqorsivik

Kalaallit filmiliaasa tammatsaalineqarnissaat, tak. §5, qulakkeerneqassasoq siullermeerinninnermi kissaatigineqarpoq, taamaalilluni filminik tammatsaaliuinerup allaffissornertaa **filminstituttimit** isumagineqassalluni. Tamatumunnga Film.gl'p tusarniummut akissutaa ilaatigut tunngavilersuutigineqarpoq, tassunga ilanngullugu atuakkanik atorniartarfiit pillugit inatsimmi aalajangersakkani kalaallit filmiliaannik tammatsaaliuinissaq ilaangitsoq **Nunatta Atuagaateqarfiani** kalaallit filmiliaannik piorsarsimassutsikkut kalaallit inuiaqatigiivinit nalituut pillugit paasisimasat nukissallu pisariaqartinneqartut pigineqannginneri peqquugalugu. Tassunga tunngatillugu Naalakkersuisut tusarniaanermit allakkiami paasisimasallit nukissallu amigaataanerat ilumuunnginnerarsimagaat ataatsimiititaliamit maluginiarneqarpoq.

Siulersuisut

Siunnersuummi §7-imi ima allassimasoqarpoq:

- § 7. Kalaallit Nunaanni Filminstitutti aqunneqarpoq siulersuisunit 5-inik ilaasortalinnit, ataatsimut tamarmik filmiornermut tunngasunik ilisimasaqarluartunik, aamma tusagassiornermik ingerlatsinermik, ussassaarisarnermik, suliffeqarfimmik ingerlatsinermik, aningaasaqarnermik aqutsinermillu ilisimasaqarluartunik.*
(Ataatsimiititaliamit erseqqissarneqartut)

Ilutigisaanik ataatsimiititaliamit maluginiarneqarpoq siunnersuummi § 8, imm. 1-imi ima allassimasoqartoq:

§ 8. Naalakkersuisut inassuteqaatitaqanngitsumik siulersuisuni siulittaasumik toqqaasarput. Siulersuisuni ilaasortat sinneri imatut toqarneqartassapput:

1) Ilaasortaq ataaseq Film.gl -imit inassuteqaat naapertorlugu.

2) Ilaasortaq ataaseq Kalaallit Nunaanni Eqqumiitsuliornermut Aningaasaateqarfimmit inassuteqaat naapertorlugu.

3) Ilaasortaq ataaseq isiginnaartitsisartut peqatigiiffianiit SILA-mit inassuteqarnikkut.

4) Ilaasortaq ataaseq Sulisitsisunit NUSUKA-miillu ataatsimut inassuteqarnikkut.

Imm. 2. Inassuteqaataasut naapertorlugit siulersuisuni ilaasortanngortut akornannit siulersuisut siulittaasup tullissaa qinertassavaat.

(Ataatsimiititaliamit erseqqissarneqartut)

Siulersuisunut inassuteqaatigineqarsinnaasut filmiliornermut tunngasunik ilisimasaqarluartuussasut, soorlu inuussutissarsiornermut eqqumiitsuliornermullu tunngasunik, ataatsimiititaliamit paasineqarpoq. Siullermeerinninnerup nalaani erseqqissaatigineqarpoq kattuffeqarnissaq imaluunniit suliffeqarfimmik **nunat tamalaat akornanni inuussutissarsiornikkut paasisimasalimmik** peqarnissaq **pingaaruteqartoq**, soorlu assersuutigalugu **Visit Greenland** Kalaallit Nunaata attaveqaatitigut avammut pilerinarsarnissaanut annertuumik pikkoriffeqartoq. Taamatuttaaq ataatsimiititaliamit maluginiarneqarpoq Film.gl'p tusarniaanermut akissutaani allaqqasoq Visit Greenland inassuteqaatigineqarsinnaalluortoq, kisiannili Sulisitsisut aamma NUSUKA pissusissamisoornerpaajussasut Naalakkersuisut tusarniaanermut allakkiaminni allassimasoq aalajangiusimaannaraat, Visit Greenlandip toqarneqarnissani kissaatiginikuunngimmagu.

Ataatsimiititaliamit aamma maluginiarneqarpoq **siulersuisunut ilaasortat pillugit piumasaqaatit aammalu najugaqavissuunissaannut piumasaqaatit** siunnersuutip siullermeerneqarnerani eqqartorneqartut. Siunnersuummi § 9-mi ima allassimavoq, siulersuisunut ilaasortat Kalaallit Nunaanni najugaqartuussasut.

Sassartitsisoqartarneri tunngavigalugit **siulersuisut ukiunut sisamanut ilaasortaatinneqarlutik inissinneqarnera** tak. § 11, ataatsimiititaliami eqqartorneqarpoq. Ataatsimiititaliamit ima paasineqarpoq siulersuisuni ilaasortat filmirik suliaqartartussat eqqarsaatigalugit **ukiuni marlunni** ilaasortaasarneq pissusissamisoornerpaajussasoq, taakkuami ilaasortaannermini filmirnut tapiissutissanik qinnuteqarsinnaassanngillat inuussutigalugillu. Ilaasortat filmiliornermik suliaqartartut ilaasortaajunnaaraangamik aningaasanik tapiissutinik qinnuteqarnissaminnut periarfissagissaarnerussapput. Tamanna ima isumaqassaaq inuit filmiliorartut filmiliorartuunertik inuussutigisinnaalissavaat Kalaallillu

Nunaanni filminik siarsaaqataasinnaalissallutik.

Ataatsimiititaliap isumaqatigiittup **Naalakkersuisut kaammattuuteqarfigai** siunnersuutip matumani pineqartup pingajussaaneerreqarnissaanut allannguutissatut siunnersuuteqaqqullugit, taamaalilluni siulersuisut ilaasortaatinneqartarnerat **ukiunut marlunnut** appartinneqarsinnaalissalluni.

Ataatsimiititaliamit ima paasineqarpoq siulersuisuni ilaasortat minnerpaamik ukiuni tallimani Kalaallit Nunaanni najugaqareersimasuussasut, **Naalakkersuisunullu kaammattuutigaalugu** allannguutissatut siunnersuusiussatut taamaalilluni siulersuisunut najugaqartuunissamat piumasaqaat **minnerpaamik ukiunut tallimanut aalajangiunneqassasoq**.

Kalaallinut ilinniagaqarneq assigisaaluunniit pequtaalluni nunatta avataniittariaqarsimasunut ukiuni tallimani najugaqarsimasussaataitanermut piumasaqaat atuutsinneqannginnissaa ataatsimiititaliamit pingaartinneqarpoq.

Aningaasat tapiissutit utertitsisarnerlu

Siunnersuummi § 18-imi allassimavoq, aningaasaliissutit Kalaallit Nunaanni Filminstituttimeersut anguniakkanut eqqortunut atorneqarpata anguniakkanut immikkut ittunut aningaasatigut tapiissutit qulakkeerreqassasut. Tassunga ilanngullugit filmit aliikkutassiat, filmit naatsuliat aamma piviusulersaarutit imaluunniit tapiissutit allat, soorlu ussasaarinnermut saqqummersitsinermullu.

Siunnersuut akuerineqassappat **Eqqumiitsuliornermut Aningaasaateqarfiup tapiissutit aningaasaataanit 3,9 mio. koruunit filminstituttip nammineq tapiissutit aningaasaataanut nuunneqartussanngorlugit** malitseqarnissaa Inatsisartuni siullermeerinninnerup nalaani naammaginangitsutut oqaatigineqarpoq. Taakkua 3,9 mio. kr. allamiit nassaarineqaqqullugit ilaatigut kissaateqartoqarpoq.

Ataatsimiititaliaq tassunga isumaqataavoq **Naalakkersuisullu kaammattuuteqarfigalugit** allannguutissatut siunnersuuteqassasut, taamaalilluni taakkua 3,9 mio. kr. Eqqumiitsuliornermik Aningaasaateqarfimmiit filminstituttimut aningaasanut tapiissutissanut nuunneqassanngillat aningaasallu allamiit nassaarineqassasut.

Utertitsisarneq siullermeerinninnermi tigulluarneqarpoq. Tassunga tunngatillugu utertitsisarneq **kalaallit filmiliaannut aamma atuutissasoq** kissaatigineqarpoq.

Filminut toqqorsivik

Siullermeerinninnermi kissaatigineqartoq tassaavoq **kalaallit filmiliaannik tammatsaaliuineq, tak. §5**, qulakkeerreqartariaqartoq, taamaalilluni allaffissorneq

filminstituttimit suliarineqartussanngorluni. Tamanna ilaatigut ima tunngavilersorneqarpoq atuakkanik atorniartarfiit pillugit inatsimmi aalajangersakkani kalaallit filmiliaannik tammatsaaliuinissaq ilaanngitsoq **Nunatta Atuagaateqarfiani** kalaallit filmiliaannik piorsarsimassutsikkut kalaallit inuiaqatigiivinit naleqartut pillugit paasisimasat nukissallu pisariaqartinneqartut pigineqannginneri peqquqigalugu.

Kalaallit Nunaanni filmiornissamut qinnuteqaatit nalunaarsuinerlu

Siunnersuummi § 30-mi ima allassimasoqarpoq, **kikkut tamarmik** aningaasarsiuqigalugu **filmiornissaminnut qinnuteqartassasut.** Tamanna kikkunnut tamanut atuutissaaq, tassunga ilanngullugit **kalaallit filmiliaat**, tamannali tusagassiorluni suliaqarnernut atasuni atuutinngilaq. § 30, imm. 2 ataani ima allassimasoqarpoq, Kalaallit Nunaanni filmiorumalluni qinnuteqaateqartarneq pillugu, matumani ilanngullugu immikkut pisoqartillugu akuersissutit pillugit piumasaqaatinik saneqqutsisinnaanermut Naalakkersuisut ersarinnerusunik malittarisassiussasut. Kalaallit filmiliaat aalajangersakkami ilaasariaqanngikkaluartut siullermeerinninnermi uparuarneqarpoq, qinnuteqaatit suliarineqarnerini allaffissornerup annikinnerulernissaanut tamassuma iluaqutaasinnaanera peqquqigalugu.

Taamaattumik ataatsimiititaliaq Naalakkersuisunut kaammattuuteqarpoq allannguutissatut siunnersuummik saqqummeeqqullugit, taamaalilluni kalaallit filmiortartut qinnuteqaqqaarnissamut nalunaarsuinissamullu piumasaqaammut ilaatinneqartariaqarnatik.

Siunnersuutip aningaasatigut kingunerisassai

Siunnersuutip piviusunngortinneqarnerani aningaasatigut kingunerisinnaasai siunnersuutip oqaaseqaataani nalinginnaasuni allaqqapput.

Siunnersuut 2025-mut aningaasalersorneqarnissaanut periarfissanik misissuisoqassasooq ataatsimiititaliap paasivaa.

Tassunga atatillugu siulersuisunik aatsaat 1. april 2025 aallarnerfigalugu pilersitsoqarnissaa naatsorsuutigineqartoq ataatsimiititaliamit maluginiarneqarpoq, tamannalu ima isumaqarluni **2025-mi** akissarsiaassanut aningaasartuutissanullu allanut aningaasartuutissat **162.500 kr.-nik** annikinnerussasut.

Ilutigisaanik Naalakkersuisup naatsorsuutigaa Instituttip aqutsisussaa sulisussallu allat aatsaat 2025-mi ukiakkut atorfinitsinneqarsinnaassasut. **2025-mi sulisunut** aningaasartuutissat 675.000 kr.-usussatut naatsorsorneqarput, taamatullu ukiumoortumik 2.100.000 mio. kr.-usussatut naatsorsorneqarput. Instituttimut **2025-mi aningaasartuutissat allat** 600.000 kr.-usussatut naatsorsorneqassasut naatsorsuutigineqarpoq, taamatullu ukiumoortumik 1.700.000 mio. kr.-usussatut naatsorsorneqarput.

Taamaattumik **2025-mut 1.438.500 mio. kr.-inik aningaasalersorneqarnissaanut periarfissanik ujartuisoqassasoq** ataatsimiititaliamit maluginiarneqarpoq.

Ataatsimiititaliap maluginiarpaa instituttimut 2026-mi tapiissutitut aningaasaliissutit **3.900.000 mio. kr.-usut Eqqumiitsuliornermut Aningaasaateqarfimmit (EA)** nuunneqartussaasut. Eqqumiitsuliornermik ingerlatsinermit Naalakkersuisut tapiissutitut aningaasaliissutai EA-mit allaffissornikkut aqunneqartarput, taakkua qinnuteqartut malillugit agguarneqartarlutik, aammalu eqqumiitsuliornermik suliaqartartunut tamanut Eqqumiitsuliornermik ingerlatsineq pillugu Inatsisartut inatsisaanni ilaasunut attuumassuteqarluni. Aningaasaliissutinik nuussinissaq Eqqumiitsuliornermik Aningaasaateqarfiup, Kommuneqarfik Sermersuup tusarniaanermut akissutaanni aammalu siunnersuutip Inatsisartuni suillermeerneqarnerani ajornartorsiutaasussatut uparuarneqarpoq.

Tamatuma saniatigut ataatsimiititaliap maluginiarpaa **Filmiliortarfiup** Naalakkersuisunit aamma Kommuneqarfik Sermersuunit tapiissutitut aningaasaliissutit pissarsiarisartagai 800.000 kr.-usut **ingerlaannassappata aatsaat allanik aningaasaleeqataasooqartassappat pissarsiarineqartassapput**. Piumasaqaataasoq taanna naammassineqarsinnaanngippat Nunatta Karsianiit Filmiliortarfimmut aningaasaliissutit qaffanneqartariaqassapput.

Ataatsimiititaliap inassuteqaatai

- Kaammattuutit qulaani allaqqasut pillugit Naalakkersuisut allannguutissanik saqqummiussereerpata ataatsimiititaliap isumaqatigiittup Inuit Ataqtigiit, Siumut aamma Naleraq siunnersuut ilusimisut iluseqartillugu akuerisassanngortippaat.
- Inatsisartut suliarinninnerat tunngavigalugu Inatsisartut inaarutaasumik pingajussaaneerinnillutik suliarinninnissaat sioqqullugu Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamut suliarineqaqqittussanngorlugu inatsisissatut siunnersuut ingerlateqqinneqassasoq **ataatsimiititaliamit inassutigineqarpoq**.

Taama oqaaseqarluni isumaliutissiisummilu allassimasunut paasinnilluni ataatsimiititaliap siunnersuut aappassaaniigassanngortippaa.

Najaaraq Møller
Siulittaasoq

Mette Arqe-Hammeken
Siulittaasup tullia

Dines Mikaelen

Peter Olsen

Edvard Nielsen Aronsen

